

Script of Morning Gojri News Bulletin 23 December 2024 at 1015Hrs

مارننگ گو جری نیوز بلیٹن مو رخہ 23 دسمبر 2024

یوہ آکا شوانی جموں ہے باغ علی طاہر تیں خبر سُنو۔

PM Rozgar Mela

وزیر اعظم نریندر مو دی اچ نواں پهرتی ہون آلا 71 ہزار نوجواناں مانہہ ویڈیو کانفرنسنگ غے ذریعے تقرریاں غا خط تقسیم کریں گا۔ وے اس موقع ور اک اجتماع سنگ خطاب وی کریں گا۔ یہ روزگار میلا ملک گا 45 بکھ بکھ مقامات ور لا یا جائیں گا۔ یوہ اقدام وزیر اعظم غی طرفوں روزگار پیدہ کرن غا اُن غا وعداں نانہہ پوراں کیا جان غا سلسلہ مانہہ کیو گیو ہے۔ اس اقدام سنگ ملک غی تعمیر تے خود روزگاری مانہہ شرکت کیا جان غا سلسلہ مانہہ با مقصد موقع مہیا ہو سکیں گا۔

India Kuwait

بھارت تے کوویت نے دراندازی سمیت دہشت گردی غی ہر قسم غی اک آواز مانہہ مزمت کی ہے۔ دواں ملکاں نے دہشت گردی غی مالی معاونت غا ڈھانچہ تے اس غی مدد کرن گا رستا روکن ور وی اتفاق کیو، تانجے دہشت گردی غا ہر قسم غا ڈھانچہ نانہہ ختم کیو جا سکے۔ وزیر اعظم نریندر مو دی غا کوویت دورہ غے دوران دواں ملکاں نے دہشت گردی ور قابو پان غی خاطر بہتر تعاون سائبر سکیورٹی تے انتہا پسندی غی حوصلہ شکنی غا موضوعات ور غور کیو۔ وزارت خارجہ غی طرفوں جا ری کیا گیا اک مشترکہ بیان مانہہ کہیو گیو ہے جے دواں ملکاں نے دہشت گردی مخالف تعاون مانہہ باہدو کرن ور اتفاق کیو ہے۔

Pak Militant Arrested

جموں کشمیر پولیس نے پاکستانی تربیت یافتہ اک دہشت گرد جا وید منشی نانہہ حراست مانہہ لے لیا ہے۔ اس دہشت گرد نانہہ مغربی بنگال غی پولیس نے بھارت بنگلہ دیش سرحد وروں گرفتار کیو ہے۔ اس دہشت گرد غو تعلق پابندی یا فتنہ تنظیم تحریک المجاہدین سنگ دسیو گیو ہے۔ جہیزو آئی ای ڈی تہماکہ کرن تے دوجا ہتھیار چلان مانہہ تربیت یافتہ ہے، تے یوہ لشکر طیبہ دہشت گرد تنظیم غی ہدایت ور بنگلہ دیش جان غا فراق مانہہ تھو۔ حراست مانہہ لیا گیا اس شخص نانہہ جموں کشمیر پولیس غے حوالے کیو گیو ہے۔ جت اُس تیں مزید پوچھ تاچہ کی جائے گی۔

CM Reservations

وزیر اعلیٰ عمر عبداللہ نے لوکاں نانہہ فریقین دوايو ہے جے سرکار جموں کشمیر مانہہ تخصیصی منصوبہ نانہہ لے غے پیدہ شدہ تشویشاں غا ازالہ غی پابند ہے۔ سماجی میڈیا غی اپنی اک پوسٹ مانہہ وزیر اعلیٰ نے کہیو ہے جے اس معاملہ نانہہ حل کرن با رے اُن غی پارٹی نے اپنا چناوی منشور مانہہ وعدو کیو تھو، تے کا بینہ غی ذیلی کمیٹی بنانو اسی سلسلہ غی اک کڑی ہے، تانجے متعلقہ فریقان سنگ گل کر غے اس معاملہ غو نیپڑو کیو جا سکے۔ اُنہاں نے اس گل نانہہ وی تسلیم کیو ہے جے تخصیص پالیسی غی جموں کشمیر تے لداخ ہائی کورٹ مانہہ عدالتی جانچ وی جا رہی ہے، تے سرکار عدالت غا حتمی فیصلہ غی

مکمل پاسداری کرے گی۔ اسے دوران اُنہاں نے عوام ور وی زور پایو بے جے بہتر انتظامیہ مہیا کران تے تمام طبقات نانہہ بروبر موقع مہیا کران با رے سرکا ر غی کوششاں ور اعتماد کیو جا ئے۔

Tribal Minister

قبا ئلی امور غا وزیر جا وید احمد رانا نے کل لڑکاں غا پی جی ہو سٹل جموں غومعائینو کیو۔ اپنا دورہ غے دوران وزیر موصوف نے طالب علماں سنگ وی ملاقات کی، تے اُن غی بامقصد تے فائدہ مند سرگرمیاں مانہہ اپنی توانائی صرف کرن واسطے اُن غی حوصلہ افزائی کی۔ اس موقعہ ور بولتاں واں جناب رانا نے کہیو جے سرکا ر طالب علم طبقہ نانہہ تمام ضروری سہولت مہیا کران غی پا بند ہے۔ اُنہاں نے ہو سٹل مانہہ دستیاب سہولتاں با رے وی غور کیو، جن مانہہ لا ئیریری، ہو سٹل غی سہولت، کتاباں غی دستیابی، تے دوجی بہبودی خدمات شامل ایں۔ اس موقعہ ور جناب رانا نے قبائلی امور محکمہ غا ڈائریکٹر نانہہ ہدا یت کی جے طالب علماں غی بہبود غی خاطر مزید سہولتاں غی فراہمی غو منصوبو پیش کریں، تانجے طالب علماں واسطے تعلیم غو بہتر ماحول مہیا کرایو جا سکے۔

PCB India Matches

پاکستان کرکٹ بورڈ نے بھارت سنگ کھیڈیا جان آلا آئندہ سال 2025 غی چمپئنز ٹرافی واسطے متحدہ عرب امارات نانہہ غیر جانبدار مقام قرار دے دتو ہے۔ واضع رہ جے بھارت نے اس توں پہلاں چمپئنز ٹرافی غا کرکٹ مقابلوں غی خاطر ٹیم غا پاکستان غو دورو کرن تیں حفاظتی تشویشاں غے پیش نظر انکا ر کر دتو تھو۔ بین القوامی کرکٹ کونسل آئی سی سی نے گذشتہ 19 دسمبر نانہہ تصدیق کی تھی جے بھارتی کرکٹ ٹیم سنگ کھیڈیا جان آلا چمپئنز ٹرافی غا تمام مقابلوں با ٹیبرڈ ہو سٹنگ ماڈل غی بنیا د ور کسے غیر جانبدار مقام ور کھیڈیا جا ئیں گا۔ یوہ فیصلو دو حریف کرکٹ ملکاں بشکا ر پیدہ شدہ تعطل غے بعد کیو گیو بے۔ جس غے بعد ہُن آئی سی سی نانہہ 50 اووراں غا کرکٹ مقابلوں ور مبنی اس ٹورنامنٹ گا میچاں غا مقامات طے کرن غو موقع مل سکیو ہے۔

Weather

جموں کشمیر مانہہ سردی غی لہر مانہہ مزید شدت آتی جا رہی ہے۔ جت کہٹوں کہٹ درجہ ء حرارت منفی 6 عشاریہ 5 ڈگری سلیسس جد کہ زیا دہ توں زیا دہ درجہ ء حرارت 18 عشاریہ 4 ڈگری سلیسس ریکارڈ کیو گیو ہے۔ محکمہ موسمیات نے آئندہ 26 دسمبر توڑی موسم خشک رہن غی پیشنگوئی کی ہے۔ اُچا پہاڑی مقامات ور صفر ڈگری تیں کہٹ درجہ ء حرارت غی وجہ سنگ ہوا پانی غا جماؤ غی وجہ نال پیدہ شدہ تلکن غے پیش نظر مسافراں نانہہ صلاح دتی گئی ہے جے وے ٹریفک ایڈوائزری غے مطابق ہی اپنو سفر شروع کریں۔
